



Sabtu, 10 Juni 2023

Ogen : Lukas 1: 3-4



Ku Suratken Alu Ratur



Mbarenda ope lenga lit media sosial online bagi facebook, twitter, instagram ras blog, enterem jelma nuriken pusuhna i bas buku diary (sada buku kitik si megati ibereken kuncina segelah ise pe la ngogesa selain si nulissa). Isi diary enda biasana macam-macam, mulai arah nuriken kejadian si erbahanca ukur senang seh ku hal-hal si erbahansa mbuk-mbuk ate. I bas jaman gundari nuriken isi pusuh nggo reh terbukana erkiteken banci imainken alu jari-jari i HP ras banci ioge kalak.

Lukas nuratken kerna pengalamen geluhna eme kejadiin-kejadiin si lit, si idahna alu matana jine, si ipepayona alu megermet maka kai isuratkena labo nuri-nuri kerna isi pusuhna tapi fakta kerna Jesus Kristus. Janah si isuratken Lukas labo asal-asalen saja kerna Jesus Kristus tapi alu ratur ras sistematika bagi nina anak sekolah. Sistematikana mulai arah ketubuhen Jesus seh ku bas kenangkihenNa ku Surga. Gelah uga? Gelah si ngoge tulisen Lukas e pe banci ratur ngogesa dengen erpengangka ras tangkas man bana kerna kejadiin-kejadiin si lit i bas kerehen Jesus ku doni enda.

Kai si isuratken Lukas enda e me sada peristiwa si factual si pernah tejadi i doni enda. Isi surat e labo hoaks, labo fiksi ras imajinasi Lukas. Tapi enda fakta ras nyata maka Jesus pernah ringan i doni enda janah tujun isi si isuratken Lukas enda gelah kerina kalak si ngogesa tek dengen ngendesken dirina man Jesus. Kam Moria, me nggo ogendu kai si isuratken Lukas e? me tek dengen tetap ukurndu man Jesus si isuratkena e?. Bas kegeluhen si tep-tep wari pakekenlah media silit guna nuratken kesaksindu kerna Kristus alu ratur.